

Na osnovu člana 12 Zakona o javnom redu i miru ("Službene novine ZE-DO kantona, broj 8/00, 15/03 i 11/07), Zakona o izmjeni i dopunama Zakona o javnom redu i miru (Službene novine ZE-DO kantona, broj 02/08), člana 7 Zakona o zaštiti od buke (Službene novine ZE-DO kantona, broj 2/08), a u vezi sa članom 3, stav 1 Zakona o javnom redu i miru ("Službene novine ZE-DO kantona, broj 8/00, 15/03 i 11/07) i člana 12 Statuta općine Maglaj (Službene novine broj 8/07, 3/08 i 6/08), na ____ sjednici, održanoj dana _____. 2017. godine, općinsko vijeće donosi:

Odluku o javnom redu i miru

I - OPĆE ODREDBE

Član 1

Ovom odlukom uređuje se javni red i mir na području općine Maglaj, utvrđuju djela kojima se povređuje javni red i mir i propisuju prekršajne sankcije za postupke i ponašanja kojima se narušava i ugrožava sigurnost i lično dostojanstvo na javnim mjestima, mir i odmor građana u njihovim stanovima, vrijeđa moral, ometa rad organa vlasti i drugih pravnih lica, ugrožava opća sigurnost imovine, prodaje, kupuje ili nudi domaći ili strani novac, propisuju uslovi i postupak za priređivanje vatrometa, sličnih priredbi kao i druga djela kojima se narušava javni red i mir.

Član 2

Pod javnim mjestom u smislu ove Odluke podrazumjeva se mjesto na koje je slobodan pristup neodređenom broju lica bez ikakvih uvjeta (ulice, trgovi, javni putevi, izletišta ugostiteljske, trgovinske ili zanatske radnje, javni prijevoz i slično) ili pod određenim uvjetima (sportski stadioni i igrališta, dvorane, kino sale, izložbene prostorije i slično), kao i druga mjesta koja u određenom vremenskom period služe za ovakve svrhe (zemljišta ili prostorije u kojima se održavaju skupovi i takmičenja).

Član 3

Dužnost svakog građanina općine Maglaj je da ne poduzima radnje kojima se narušava javni red i mir.

Dužnost svih pravnih lica je da prilikom obavljanja svojih djelatnosti i svakom drugom prilikom vode računa da se pri tome ne narušava javni red i mir.

Član 4

Pod očuvanjem javnog reda i mira podrazumijeva se i zaštita od buke. Zaštita od buke provodi se danonoćno.

U smislu člana 7 Zakona o zaštiti od buke (Službene novine ZE-DO kantona, broj 2/08), u zimskom periodu dan traje od 06-22h, a noć od 22-06h, dok u ljetnom periodu dan traje od 07-23h, a noć traje od 23-07h.

Član 5

Pod prekršajima javnog reda i mira podrazumijeva se:

1. ko na javnom mjestu narušava javni red i mir svađom, vikom, nepristojnim ili drskim ponašanjem
2. ko na javnom mjestu, bez odobrenja nadležnog organa, prodaje ili nudi za prodaju ulaznice za sportske i druge priredbe po cijenama višim od označenih
3. ko ukloni, pocijepa ili na drugi način ošteti javno istaknute objave, odnosno oglase organa vlasti, privrednih društava i drugih pravnih lica, ako su oni istaknuti u skladu sa propisom općinskog organa vlasti ili spriječi isticanje javne objave ili oglasa
4. ko se drugom lažno predstavi u pogledu svoje društvene ili službene funkcije, ko upotrijebi lažne lične podatke kao svoje ili ko potvrdi tuđe lažne lične podatke, kao i neovlašteno nosi službene oznake
5. ko daje alkoholna pića pijanom licu, maloljetniku, duševno bolesnom licu ili licu zaostalog duševnog razvoja
6. ko na javnom mjestu narušava javni red i mir izvođenjem pjesama i muzike ili reprodukcijom iste, bez odobrenja ili protivno odobrenju nadležnog organa
7. ko priredi vatromet ili sličnu priredbu bez propisane najave ili mimo zabrane nadležnog organa ili ko ne preduzme mjere obezbjeđenja, a koje je dužan preduzeti prema ovoj Odluci
8. ko neovlašteno vrši fotografisanje ili skiciranje objekata ili mjesta koja su označena kao zabranjena za fotografisanje ili skiciranje
9. ko na javnom mjestu narušava javni red i mir učestvovanjem u tuči, zlostavljanjem ili fizičkim napadom na drugog ili ko izazove tuču, odnosno zlostavljanje ili fizički napad na drugog
10. ko na javnom mjestu narušava javni red i mir naročito drskim ponašanjem
11. ko ugrožava sigurnost ili izaziva osjećanje ugroženosti drugog lica prijetnjom da će napasti na njegov život ili tijelo
12. ko ne postupi po naredbi ili rješenju organa vlasti kojim s zabranjuje pristup ili zadržavanje na određenom mjestu ili ometa ili omalovažava organe vlasti, odnosno druga pravna lica koja vrše ovlaštenja ili njihova službena lica ili ko ne postupi po određenom zakonitom zahtjevu službenog lica
13. ko prosjači ili se odaje skitnji

14. ko navodi na prosjačenje maloljetno lice ili duševno bolesno lice ili lice zaostalog duševnog razvoja
15. ko igra hazardnu igru ili drugu sličnu igru tako da igra gubi duševno-zabavni karakter ili ko za to iznajmi, odnosno ustupi prostorije
16. ko neopravdano zalazi ili se neopravdano zadržava u zajedničkim prostorijama (stubište, tavan, podrum, šupe, ograđeno dvorište i slično) stambene zgrade u kojoj ne stanuje
17. ko na javnom mestu ustupa, prodaje ili nudi petarde i druga pirotehnička sredstva bez odobrenja nadležnog organa
18. ko na javnom mjestu govorom, pisanjem ili na drugi način vrijeđa vjerska, nacionalna, moralna i rasna osjećanja građana
19. ko neovlašteno na javnom mjestu prodaje, kupuje ili mijenja domaći ili strani novac ili hartije od vrijednosti
20. ko na javnom mjestu pocijepa ili na drugi način uništi ili ošteti novac države BiH
21. ko na javnom mjestu uživa opojnu drogu
22. ko se odaje prostituciji ili ko iznajmi, odnosno ustupi prostorije za vršenje prostitucije
23. ko drugog navodi na prostituciju ili posreduje u vršenju prostitucije
24. ko na javnom mjestu puca iz vatrenog oružja, pali rakete, petarde ili sličan eksplozivni ili zapaljivi materijal bez odobrenja nadležnog organa
25. roditelj, usvojilac, odnosno staratelj maloljetnika koji je učinio prekršaj protiv javnog reda i mira propisan ovom Odlukom, ako je izvršenje prekršaja posljedica njihovog propuštanja dužnog staranja o maloljetniku, a u mogućnosti su da takav nadzor vrše
26. uznemiravanje građana pjevanjem, sviranjem ili na drugi način u objektima kolektivnog stanovanja i individualnim stambenim objektima ili na otvorenom prostoru u naseljima od 22-06h, u zatvorenom prostoru u ugostiteljskim objektima od 24-06h, izuzev ugostiteljskih objekata tipa disko klub od 02-06h i u baštama ugostiteljskih objekata od 23-06h, ako jačina zvuka prelazi dopuštenu
27. prskanje prolaznika vodom prilikom pranja vozila, ulica, dvorišta i zalijevanja vrtova i travnjaka te prskanje pješaka prilikom upravljanja vozilom
28. bacanje leda i snijega u grudvama na prolaznike i automobile, bacanje kamenja ili drugih predmeta, kao i bacanje iz zgrada ili ograđenih prostora predmeta i smeća
29. postupanje sa životinjama na način koji izaziva uznemiravanje i negodovanje građana, pod kojim se podrazumijeva puštanje i vođenje psa bez zaštitne korpice na njušci i povodca, surovo postupanje sa životinjama na javnom mjestu, podstrekavanjem na borbu i izazivanje životinja

30. uznemiravanje građana upotrebom zvona na ulazu u stan ili kuću, kucanjem ili udaranjem a vrata stana ili kuće bez potrebe, radi pružanja usluga koje nisu ugovorene ili naručene
31. pisanje i isticanje grafiti po objektima bez saglasnosti vlasnika i drugim javnim površinama, lomljenje sadnica i rasada te vršenje fiziološke potrebe na mjestima koja za to nisu predviđena
32. kupanje na javnim kupalištima, bazenima, rijekama i potocima bez kupaće odjeće, kao i hodanje u kupaćoj odjeći u naseljenim mjestima
33. posjedovanje, prodaja i korištenje petardi i drugih pirotehničkih sredstava čijom bi se upotrebom izazvala uznemirenost građana na javnim mjestima
33. zaustavljanje i parkiranje motornih vozila na ulazu u stambene objekte, garaže, trotoare, zelene površine ili na drugim mjestima na kojima bi se ometalo odvijanje saobraćaja
34. pomjeranje posuda za smeće sa mjesta koja su utvrđena odlukom nadležnog organa, odlaganje smeća izvan kontejnera, paljenje vatre u i oko kontejnera, oštećenje kontejnera, kao i oštećenje klupa po parkovima, šetalištima i drugim javnim površinama
35. ležanje ili spavanje na ulici, putu, klupi u parkovima, čekaonicama, autobuskim stajalištima, pod mostovima i drugim sličnim javnim površinama
36. ometanje težih invalida, starijih i iznemoglih lica, trudnica i lica sa djecom u naručju da ostvare pravo prvenstva kod pružanja zdravstvenih usluga, korištenja javnog prijevoza, kupovine robe i drugim sličnim situacijama
37. izbacivanje otpadaka iz motornog vozila u pokretu na javne i druge površine
38. nošenje hladnog oružja, vatrenog oružja, bombi i drugih eksplozivnih naprava
39. uništavanje cvijeća, ukrasnog grmlja i drveća, kao i cvijeća položenog u znak porodičnih pomena na groblju, spomenicima i drugim objektima slične namjene

II – KAZNE NE ODREDBE

Član 6

Za prekršaje iz člana 1 ove Odluke, kaznit će se počinitelac novčanom kaznom u iznosu od 50,00 KM.

Član 7

Za prekršaje iz člana 2 do člana 8 ove Odluke, kaznit će se počinitelac novčanom kaznom u iznosu od 100 KM do 300 KM.

Član 8

Za prekršaje iz člana 9 do člana 17 ove Odluke, kaznit će se počinitelac novčanom kaznom u iznosu od 150 KM do 400 KM.

Član 9

Za prekršaje od člana 18 do člana 26 ove Odluke, kaznit će se počinitelac novčanom kaznom u iznosu od 200 KM do 500 KM.

Član 10

Za prekršaje od člana 26 do člana 39 ove Odluke, kaznit će se počinitelac novčanom kaznom u iznosu od 50 KM do 100 KM.

Član 11

Novčanom kaznom od 500 do 5.000 KM kaznit će se za prekršaj privredno društvo ili drugo pravno lice koje iznajmi, odnosno ustupi prostorije za igranje hazardnih i njima sličnih igara ili za vršenje prostitucije. Građanin koji samostalno obavlja ugostiteljsku djelatnost (u daljem tekstu: ugostitelj), koji iznajmi ili ustupi prostorije u ugostiteljskoj radnji za igranje hazardnih ili njima sličnih igara ili za vršenje prostitucije, kaznit će se za prekršaj novčanom kaznom od 500 do 5.000 KM. Za prekršaj iz prethodnog stava kaznit će se i lice kome je povjereno vođenje ugostiteljske radnje novčanom kaznom od 100 do 500 KM.

Član 12

Ukoliko pravno lice priredi vatromet ili priredbu bez prethodnog odobrenja nadležnog organa ili mimo zabrane istog, kaznit će se novčanom kaznom u iznosu od 100 KM do 3.000 KM, a odgovorno lice u pravnom licu novčanom kaznom od 50 KM do 1.000 KM..

Član 13

Nadzor nad sprovođenjem odredaba ove Odluke u okviru svoje nadležnosti vrše inspeksijski organi i nadležno Ministarstvo unutrašnjih poslova u okviru svoje nadležnosti.

Član 14

Kada službenici policije u vršenju službenih poslova i zadataka saznaju za prekršaj propisan ovom Odlukom, mogu privremeno oduzeti predmete koji su upotrijebljeni ili su bili namijenjeni za izvršavanje prekršaja, kao i predmete koji mogu poslužiti kao dokaz u prekršajnom osnovu.

III – PRIJELAZNE I ZAVRŠNE ODREDBE

Član 15

Ova Odluka stupa na snagu osmog dana od dana objavljivanja u Službenom glasniku općine Maglaj.

Broj:

Datum: 01.06.2017. godine

PREDSJEDAVAJUĆA OV

Svjetlana Zamboni

OBRAZLOŽENJE


Odluka o javnom redu i miru sačinjena je na osnovu člana 12 Zakona o javnom redu i miru ("Službene novine ZE-DO kantona, broj 8/00, 15/03 i 11/07), Zakona o izmjeni i dopunama Zakona o javnom redu i miru (Službene novine ZE-DO kantona, broj 02/08), člana 7 Zakona o zaštiti od buke (Službene novine ZE-DO kantona, broj 2/08), a u vezi sa članom 3, stav 1 Zakona o javnom redu i miru ("Službene novine ZE-DO kantona, broj 8/00, 15/03 i 11/07) i člana 12 Statuta općine Maglaj (Službene novine broj 8/07, 3/08 i 6/08).

Zbog čestog remećenja javnog reda i mira od strane ugostiteljskih objekata, puštanje glasne muzike do kasno u noć i drugih načina ometanja građana općine Maglaj na javnim mjestima i u njihovim domovima, ukazana je potreba za donošenje Odluke o javnom redu i miru, kako bi policijski službenici općine lakše vršili kontrolu sprovođenja javnog reda i mira.

Obzirom da je Odluka o javnom redu i miru sačinjena u skladu sa zakonskom regulativom, predlažemo općinskom vijeću usvajanje nacрта Odluke, nakon čega će se provesti javna rasprava i pripremiti konačan prijedlog Odluke.

OBRADIVAČ:

Irma Čolaković
dipl. pravnik



KONTROLOR:

Fuad Hajrulahović
dipl. ing. arh.

